

Tico Croes

E mentalidad Mesquino manera di Rudy Croes ta stroba democracia

ORANJESTAD(AAN) -- Tico Croes di AVP a duna di conoce na DIARIO cu tin hopi argumento sano cu por usa pa debati ariba e estado di democracia aki na Aruba.

Asina por debati riba e contenido di democracia y significacion di democracia den e progreso y bienestar di un pais. Segun Croes, hopi ta puntra nan mes con por ta posible cu den e region aki tin asina hopi situacion di dictadura y despotismo, mientras cu e tendencia mundial ta pa mas apertura pa mas participacion, pa mas democracia.

E punto ta cu democracia no ta un metodo, un tecnico cu por skirbie ariba un pida papel, den un constitution y den un reglamento di orden di un Parlamento.

Democracia segun Croes, ta un mentalidad, un forma di bida cu ta duna contenido na cualquier constitution of reglamento di orden.

Surinam mes tabata tin un constitution kisas mas bunita skirbi cu Aruba, cu un reglamento di orden di su Parlamento mihor desaroya cu esun cu tin actualmente den e Parlamento di Aruba.

Y apesar di tur e palabranan bunita, Surinam a conoce dos

golpi di estado. Croes a señala cu ta e mentalidad democratico aki e miembronan di fraccion MEP y en especial Rudy Croes ta carece di dje.

No tin hustificacion pa e actitud anti-democratico di presidente di Parlamento. Y e hecho cu no tin argumento pa hustifica e actitud vergonsoso di presidente di Parlamento ta sali na cla un biaha mas cu e articulo di Rudy Croes den medionan di comunicacion.

Segun Croes, e articulo ta hustifica e postura fuerte cu AVP a tuma di no participa den tripartite pasobra MEP a spera un posicion fuerte di AVP desde December pa e forma anti democratico di proceder di e presidente di Staten y di miembronan di coalicion.

Cu AVP no a tuma e decision aki na December sino awor na Januari ta demostra con dificil tabata pa tuma un decision asina drastico.

Pasobra simplemente no por sinta banda di esunnan cu ta schop nos for di Parlamento y ta ofende honor y dignidad y ta haci insinuacionnan di mas baho cu por tin contra con-ciudadanonan y contra nos mes den Staten.

Segun Croes, e argumento cu

tabata un viahe pa Hulanda AVP "lo tabata promer den fila pa subi avion" atrobe ta refleha e mentalidad chikito di Rudy Croes.

Acaso AVP a biaha bay Londres hunto cu MEP, sin siquiera worde invita y na unda mester a pasa e berguenza cu no a permiti e delegacion di Aruba drenta e reunion.

Acaso ta un miembro di AVP den delegacion pa Londres a dicidi di bay Hulanda pasa vacation?

Cu AVP no sa ta den Staten di Aruba, ta un indicacion atrobe cu Rudy Croes no ta comprende e trabao den Staten. Segun Croes, tin numeroso ehemplo di reunion cu mayoria di miembronan di fraccion di MEP no tabata presente na reunionnan y na unda diferente miembronan a sinta bisa un pia di palabra.

Croes a mustra cu bay trabao no kiermeen traha. Bisa cu tur dia bo ta na Parlamento y tog ningun hende no por localisabo no kiermeen traha.

Croes ta spera cu e debate ariba e estado actual di democracia enfoca realmente unda e mester ta, esta ariba e tipo di mentalidad cu lo yuda e pais progresa y desaroya na unda tur hende por tin su opinion sin cu e tin miedo di represaya.